

Thursday, April 24, 2025

Time - 2:30pm - 2:35pm

REGIONAL NEWS BULLETIN

(MIDDAY)

BORDER TALKS

Mizoram leh Assam ramri chungchanga inbiakna State Secretary-level meeting nei turin vawiin khan Home Secretary Pu Vanlalmawia hovin palai mi 7 in Guwahati khawpui an pan.

Home department atanga thu dawn danin Mizoram leh Assam official-te inbiakna turah hian ramri buai chungchanga a hma lama lo sawi tawh leh state pahnih la inrem theih lohnate sawiho leh a, kimchang taka thil awmdan inhrilh tawn tura ruahman a ni a. He inbiakna tur chungchangah hian Mizoram sawrkar atanga thu ken turte leh pawimawh dang chi hrang hrang te chu April ni 16 khan Home Minister Pu K. Sapdanga hovin sawiho a ni a, Home Minister chuan ramri him tak, mipuite thlamuang taka an khawsak theihna tur nawr chhuah chu an thupui ber a nih thu a sawi.

Pu K. Sapdanga chuan Mizoram tana channa awm lo tura theihtawp chhuah a nih thu sawiin Mizoram leh Assam ramri zirchiang tur Study Group member 4 awmna pawh kumin January ni 25 khan din a ni a ti a, he Study Group hian chhuanawm takin hma an lak thu leh, anni zarah document tan chhan tur pawh an nei tha tawh hlea an inhriat thu a sawi a. Mizoram aiawha ramri chungchang inbiakna a palai kalturte pawh an inpuahchahna a tha thawkhata a hriat thu a sawi bawh.

Thudawn danin naktuka Official-te an inbiakna rah chhuah a zirin Mizoram home minister leh Assam border protection & development minister te a vawi ngana atana inbiakna chhunzawm tura ngaih a ni a. Tun tumah hian ni khat chauh inbiak phawt tur a ni a, thil awmdan a zirin official-te inbiak chhunzawm leh rawt a ni mai thei bawh ni a thudawn a ni.

Mizoram leh thenawm state Assam in kum 2021 July ni 26 a Vairengte dai-a Police-te'n silai hial an hmehpuah avangin ramri buai chinfel dan tur hi chak zawka dap a ni ta a. Hemi kum vek hian Assam border protection & development minister Pu Atul Bora hovin Assam palaite Aizawlah lokal in khatih laia home minister Pu Lalchamlia hovin Mizoram palaite nen an inbia a. A kum leha Aizawlah bawh inbe lehin kum 2022 November thla khan Guwahati-ah minister pahnih kaihhruaite hi an inbe leh a. Vawi tam tak state pahnih palaite bakah Chief Minister ve ve pawh inbe pawhin ramri buai erawh chinfel ala ni rihlo a ni.



CISF TAKES OVER SECURITY AT LENGPUI AIRPORT

Ministry of Home Affairs chuan Lengpui Airport venhim hna thawk turin Central Industrial Security Force a ruat thar a, he hna hi vawiin atangin an thawk tan ang.

CISF ten Lengpui Airport vawiin atanga venhim hna an thawh bultanna leh anmahni lawmna hun buatsaih hi Mizoram DGP Anil Shukla chuan vawiin khan a hmanpui a, CISF hian ramchhunga hmun hrang hrang Airport ah venhimna hna anlo thawk tawh thin a, Lengpui Airport hi Airport 69 an enkawlina tur a ni.

Mizoram DGP chuan Lengpui Airport chu Mizoram leh ramdang inpawhna atan hmun pawimawh tak ani a ti a, CISF in an enkawl tur chu venhimna kawngah rah tha a chhuah dawn tih sawiin Mizoram himna leh hmarchhak state tan himna tam tak a thlen dawn a ti a, Mizoram chu state ralmuang leh nuam tak ni mahse tun hnaiah ruihhlo tawlh a hluar hle a ti a, dan phalloh tawlhruk thil a tam avangin hemi kawnga hmala tur hian Mizoram Police ringawt an tawh lo a ti a, CISF in Lengpui Airport-a venhim hna an thawh tur chuan kawng tam takah Mizoram Police hnathawh a pui dawn tih a sawi bawh.

Lengpui Airport thuneitute tarlan danin CISF Unit lokal tur te hi an vaiin 214 an ni a, amaherawhchu an awmna hmun tur peih fel ala nih loh avangin CISF Unit zinga 121 an lo kal phawt dawn a ni.



FMGE&W ON MUHCS

Mizoram sawrkarin Medical Reimbursement System thar a kalpui dan chungchangah Mizoram sawrkar hnathawh inzawmkhawm pawl FMGE&W chuan sawrkar hnathawhte phalna la hmasa lova hlawh cut an tum avangin dan hmanga hmalak an tum.

Federation of Mizoram Government Employees & Workers (FMGE&W) chuan MUHCS-a huam tir ve lo turin vawi tam tak sawrkarah thlen ani tawh an ti a, MUHCS chu ala fel tawkhlo avagnin sawrkar hnathawh hlawh cut chu an duhlo tih sawiin Sawrkar hotu lu hnenah an duhloh thu vawi tam tak an thlen tawh tih sawiin sawrkar hnathawhte phalna la hmasa lova hlawh cut an tum chungchangah dan hmanga hmalak an tum thu an sawi a, hetiang an tum chhan hi kumin April ni 1 ah an hlawh cut na tur Head thlenga siam ani tih sawiin kalphung felfai lo ala nih avangin damlo inenkawl na chungchangah harsatna tawh an awm tih sawiin Dan hre mi te rawn a, dan hmanga hmalak an duh thu an sawi a, vawiinah Chief Minister hnenah lehkhah thehluh an tum tih sawiin an ngenna chu sawrkarin a ti hlawhtling lo anih chuan Court ah kal an tum thu an sawi bawh.

Mizoram Universal Health Care Scheme hi nimin khan BCM enkawl Christian Hospital Serkawn chuan zawm phawt ni se, an ti a. hemi atan thil tul dangte chu Damdawi In thunneitu, Hospital Management Committee kutah an dah a ni a, hetihlai hian he scheme kalpuina kawnga a pawimawh tak pahnih Sorkar hnathawhte leh Private Hospital te nena inrem tawnna hi ala awmlo a ni.



MIGOSTU STIR

Mizorama zirna in hrang hrang Adhoc atanga dinhmun sang zawka sawrkar hmasa in a hlan kai sawrkar tharin a hnawh sak te chuan sawrkar laka an lungawilohna lantir na'n an hnathawhna hmunah tunkar chhung "Badge dum" an bel dawn a, sawrkar chuan an harsatna hriatpui se an duh thu an sawi.

Mizoram Govt. School Teachers Union (MIGOSTU) chuan an thuchhuah ah Adhoc atanga provincialised an ni chu sawrkar hmasa in inthlan dawn vang chauha a tihsak anga sawi chu diklo antih thu sawiin sawrkar pawh an dinhmun siamthat theih nan an dawh vek an ti a, tun a sawrkar mek chu an dinhmun ngaia dah let turin an phut tih sawiin Cabinet thukhawmin High School leh Middle School Headmaster kum tam tak lo thawh te zirtirtu pangai

a an tlak hniam theihna tur an rawn telh thar chu an duhloh thu an sawi a, Cabinet thukhawmin a relte chu a rang thei ang bera ngaihtuah that leh ni se an duh thu leh provincialised status ah dah let an duh tih an sawi.

MIGOSTU chuan sorkarin tehfung a hmanah thingtlang leh khawpui inang renga an siam chu dik lo an tih thu sawiin, thingtlanga school te tan kaisan ve theihna a awm tawh dawn lo nia an hriat avangin dan thar an siam chu sut leh vat turin an phut tih an tarlang bawk.

Tun dinhmunah MIGOSTU ah hian Higher Secondary School 12, High School 120 leh Middle School 48 an awm mek a ni.

